

靜

嘯

齋

存

草

靜嘯齋存草

卷之四

留篋稿之一

江行至有所思計七十七首

靜嘯堂存艸卷之四

西吳

董斯張遐周甫著
韓曾駒人穀甫訂

畱篋稿

江行

越江澄泓縱幽眺一片征帆疾於鳥蘋白楓青如向
人南岸漸高北山小忽爾巨浪堆如銀驚雷下來搖
地垠游子駭呼傍人笑乃知世有風波民

山遊

出郊望山氣遂覺銷塵氛徑曲艸常合烟橫峰不分
穿林驚獨鳥越澗尋寒雲撫景詎無侶深秋麋鹿羣

子規啼

紫山子子嫡杜宇佚女掩喉唱白苧濃春三月頃刻
迴殘芳銷得帝子催哀啼不散血痕老夜半染遍吳
宮艸一啼妖花脫細跗再啼花舞藥亦枯酸風吹墮
目車宛轉碎却碧玉霞危巒溼煙黯不綠雛鶯妬
乳燕哭

春雨曲

雨如建瓴北風怒昨夜小池添尺五鵲鵲驅嬾妬欲
死老漁擘網將上市青青隴麥趁逝波白日匿海奈
若何紫孺少年闌春游却載小妓登蘭舟

送唐侍御美承入都

惠風無濁雲直影無枉枝靈契接自然千古託在斯
孰知巖際石梧臺亦其時菰蘆滯微命秋艸翫者誰
謠詠衆所乘獨見將成疑清揚接伊始遽以瓊琨貽
義傾分無塞言約懷旣披神賞詎延譽蒼春乃言離
方舟遵北渚歌吹喧江湄茲行立玄策德譽如璋珪

射隼高墉間將支天下危君子務其大岐路愴何爲
不孤亮有徵還睇精莫持寄情千里月曠哉燭心知
送沈千秋工部北上

東風枕溪水溪雨日能聞雨色尚未絕是時方送君
蘭香迎棹轉柳影近帆分從此美人去江南空片雲
其二

高雲不可接寂寂照征車三月正江上桃花夾岸如
眼前下若酒絕勝長安書入洛方吾事翩然慰索居
半塘偕東生巨源遲李玄白不至

命酒當春盡停舟及暝鍾溪香通淺艸寺影託深松
失意豈足問所期殊未逢祇今歸路月眇眇欲何從

送韓延年之燕

君不聞耶俗人笑笑我支離寡同調不狂不慧垂十
年又不種瓜不垂釣有時床頭寫異書醉則枕書晨
閉廬瓠落無成乃至此偃仰一室何所如男兒不能
出門走此身竟爲妻子有生來羞與鷄鶩爭作事當
思古人口惟我與君有此情君獨翩然先我行年何
其少志何壯衣裳奕奕朱霞生居恒在家多遠意一

身遠行了無異豪心直欲凌蒼空遂覺須眉都有氣
明朝便坐吳門馬先秋可到燕臺下其中磊磊多賢
豪豈無有人識君者中夜嘯落寒溪雲眼前蕭索安
足云大江雪盡我亦北香山寺中來問君

留吳門酬徐姊范夫人別詩二章

衰艸本無色嚴霜復下之問年空逝水撫臆一游絲
以姊善病日憐予遙別時浮沉非所報去住總堪非
其二

貧病十年備空悲先緒荒春園畱弱艸烟沼憶殘陽

匹馬亦快事浮雲非故鄉言酬骨肉愛翠羽拂扶桑
將入長安千秋沈使君長卿溫太史拏舟餞送
贈此爲別

一艇繫村柳夷猶君若何離懷深似病醉語宛成歌
短照塢邊盡淒風川上多明朝今日酒此地只雲阿
訓陳太始侍御見訪道院之作

去郭纔二里人間事事稀艸香當雨動鍾韻入烟微
抱膝有遙想空庭來靜機無君淹白晝未悟掩關非

其二

習靜不知暑午餘人扣關停車石林下握手松霞間
清論杳相續道心殊復閒西山有落景澹澹送君還

夜坐葛鵠山房

山是先
公墓所

獨枕無高臥空山與一燈林枯風轉急池動月初升
涼夜猶積雨不言如對僧烏啼霜下竹驟使淚沾襟
葛鵠山行二首

石路曲而古及秋來此間竹煙逢嶺絕人影到谿閒
十里復五里登山猶望山近知無虎患林黑有僧還

其二

亂山分客騎嵐氣訥蒼蒼入樹風傷綠流雲礪寫香
樵秋蘿逕險獲晚秫田荒野叟爲余說仙人舊此鄉

戊申冬仲望四夕臥疾作

玄冬氣方凜一夕三鳴鷄勁風來射人似聞村鬼啼
羣響忽無有吾生亦如茲伏枕但衰吟魂戰骨若離
家人訊我苦黥黥徒自知老婢然枯松啖我以薄糜
胸中有餘酸舉手再却之獨見一燈下照此七尺屍
血肉本非真况乃子與妻江滫無異浸盆土無異施
朝聞已矣夫乘化安能稽當知冥冥際智者何所携

長水道中阻雨作

小艇入村口波聲急未停里驚洪水後雨似去年聽
漁者來何所持竿唱莫汀物情已如此醉已不須醒

秋蘭

一池齊白艸獨此及堦生寒色尚能翠孤香空復清
秋枯湘月影花入夜波聲公子竟何所潺湲無限情

湖上送人嶺南

乍見卽相送遠行多苦辛望湖亭畔月冉冉隨南輪
飛鳥亦礙嶺濃嵐將中人縱令歸計早不及錢塘春

送范東生楚遊

范生握余爲余語將逆西風入荆楚百壺酒盡神蕭
蕭中婦牽衣不相許晴雲夾山江可憐今夕卽來江
上眠布帆一掛四千里老龍忽舞波如船蘆中浩歌
盡欲靜楚水下寫吳人影大堤秋色竟何如獨醉美
容暮烟冷邇年好遊遊轉奇輕裝遠客無人隨如我
掉眉終日坐不借汝行何所爲

酬東生秋日見懷之作

才識閉門好茲情卒未安西風來不罷燕子去無端

意與秋水遠人兼霜艸寒登高聊以望吳樹入雲底

喜霽

觸意自成澹閒房聊可娛濕花猶覺重橫艸漸能扶
窈爾遠山出曠然平野孤隣童夕沽酒以此勸農夫

送趙長文之江右

識君六七載日說香鑪峰至此始能赴到時還及冬
湖雲迎短櫓山雪吹孤蓬渺矣遠遊意今人誰可從

送周虞卿北遊

與汝對杯酒常有千古心高鳥厲玄霄豈爲堦下禽

偉哉嚴夫子落落良足欽九州入涉之遐跡遯難尋
奈何低雙眉終歲抱書淫未能出庭戶衰颯俄見侵
我聞燕之北崇臺累黃金明王釣豪桀神契齊古今
蹇驢或服箱將使奇骨沉念此不能寐叩角空孤吟
願爲遠遊敖拙毫賦上林子今爲我前餞斯嘉樹陰
輕刀杳何許所悲春漲深脩路安所悲居者思難任
哀哀驟然起中坐揮清琴微其鑒素懷誰與振茲音
自竹溪之東林山山故沈東老逢回仙處

遂有南遊期清溪聽予遡舟橫水聲緩棹轉波文聚

桑桑翳曉空密葦失漁路東山來須臾長年此焉駐
崇深微所懷眺聽僻成趣娟娟艸發香鬱鬱花藏露
日午林就暝風微欄爭赴躊躇無畱賞俛仰乃延步
漸覺人籟虛獨與孤雲遇青松直猶倚野鳥飛仍互
新祠荒莽伏危閣寒烟寫尊酒當樵譌宛矣景云莫
招隱理不潛懷仙感方注區中復何爲象表授靈寤

送茅止生入都

神韻託入遐下車焉可親秋飈昨不小怒馬扶仙裾
鉏粉犯霜夕沙艸含香塵豪心償俗笑雙眼橫白雲

賦寫二千言
魂接黃衣人
浩歌天欲碎
寒水波磷磷
古人羞目攝
今人聞不聞

秋夜孤坐有懷王五亦房二首

經年無意別
十日願君留
未盡杯次語
復催燈下舟
期因多病失
夢向不眠求
愁極無人會
長天一雁流
其二

憶君掩關處
墜葉滿中宵
亦有同病者
一燈然竹寮
機空世皆曠
神賞跡彌超
牕月澹盈尺
相親如不遙
壽福唐葉相公二十八韻

間氣開閭嶠瑤光動海潯九蒼扶舜日八裔注商霖
預覩精乘鼎寧惟博辨參含弘真可挹茹吐詎能尋
赤鼎流神彩青鍾見大音澄河遙有潤玄鏡照無心
借箸需淵畧汚茵識素襟艱勞方獨負蹊轍重如今
贊治煩衡軸調元悵金鸞叩闥空就艸脫珥不聞簾
職乃經年曠官尤下位侵賜環虛野莽聚訟滿朝簪
意以憂還遠謀緣老更沉忠誠千古燭啓沃五雲深
帝載資維翰王猷託共斟仙厨飛瑞葉聖律舞輕禽
浩矣風烟謐皇哉氣象森溫恭齊孔樹廉折肖騶琴

理湛全忘物神閒或自吟雍熙羣品增齒德庶明欽
清旭當秋院鮮霞薄曉岑芝香瓊砌側松翠玉墀陰
賚酒傳中使靈瓜剖上林鴻聲知未艾渥寵倍難任
策報圖由豫匡時翼知臨無前勲轉懋善下道彌情
頌臈聊追昔繁詞媿擲金

寄內兄

夕雲連復斷寂寂滿平蕪想見秦淮客方邀淇水姝
辭家予較遠聽雨夢還孤獨有雪中騎逢君燕市隅
書壁

海雲南來天晝昏傷哉無力排帝闥荒田無人跳竒
鬼白日不照啼精魂剖心向人竟誰惜參前白楊風
瑟瑟人生不得行胸懷雖壽松喬亦何益

茗上逢夏長卿作短歌

黑風吹天作竒寒峴山欲摧碧湖泣似聞山鳥號其
聲對君無語隄邊立長安匹馬初遇君握手大川如
所聞酒酣浩歌急相視秋齋冉冉來黃雲切雲之劍
衆女疾扶搖墜翼從此分射工入城橫射人英雄擲
筆羞爲文今者不雨昨者雨淡曹周兩且莫舞上帝

伶才自客汝蒼岩曉曉日將吐

碧潭霧

澄波春可掬片霧欲凌空蕩漾浮寒色飄飄度曉風
鳥迷潭樹下人識棹歌中乘月夷猶處依然四望通

落日

落日汀洲靜高天轉沈寥烟橫沙岸白波急遠山搖
野水倚孤棹前村歸暮樵清歌何處起無數荻花飄
詠瀑布作

石屏飛素瀑林杪撲空雲碎月千重挂驚雷十里聞

鶴羽晴猶濕猿聲夜或分還將衆山響絃上寫清氛
送范東生遊滇中

荆吳雙眼盡復發滇南橈遊道轉之僻遠心誰可招
波危惟度鳥山立但通樵定有異聞積經年歸不遙

歎逝曲爲凌初成賦

白袷少年才如虹寸毫未腐千秋空相交酒人古風
氣兩兩調笑城日紅乘船小妹楊柳下拂面畱卿手
輕把玉兒掩淚驕齊王西陵油壁連驄馬秦淮橋邊
醉菱荷笑眼半合還復歌雙魂纏綿奈何許南山有

石青礬蛾黑風折雲魚鱗碎繡鳳樓空洞簫死管凌
道人來不來夢艸含烟泣春水

華濟之宅看蘭

一室靜於水楚蘭唯與君誰當炎歊月孤翠來寒雲
千花散幽采叢葉搖異芬歸深四更夢猶是醉中聞
送丁長孺入都

山中來鶴書十月上征車奇尚自昨日京華卽故廬
離杯人慷慨遙旆馬躊躇江北江南路霜天衰草餘
馮母查碩人挽歌

青陽三月不雨
巨雷隆隆百神下誰殪鬼伯返亡者幽州還魄杳如烟
昨日青鸞忽然寡惟風入堂驚素帷儂今獨活爲誰
施淚痕歸地似盈尺倒行著湖水無白一寸愁心
變石枯鴻夷畏填龍嘯夕南山赤土可殉君火中燄
作共姬焚雙魂蕭條秋雨合甘泉古像吹黃雲

送孫子長博士北上

遷秩旣三歲入官仍一儒素心澹自得微雨開征艫
波濤浩長川帆風循葦蘆家中來篋書童子負與俱
賓僚並出祖兼繫揮白鬚良圖廣盛年爲駒豈爲鳬

江北滿秋艸黃塵吹月枯當知枕間意未敢無南湖
有懷沈千秋使君病中却寄二首

松關歲不啓彌覺遠心增漸忍酒杯歇還教花氣澄
索逋時到客枯坐欲無僧何似悠悠者霜天日飲冰

其二

昔者淮陽守余聞臥治之逃榮非作異入世詎同時
檢藥神猶費觀魚樂未疲是中真有得惟遣竹林知
贈別馮大若木二首

六載如一日素心俱不疑笑談無俗調慷慨或情癡

茲別縱非遠懷君安可支牀頭熱杯酒爲定往還期

其二

有酒未能盡有心那得知空庭下寒月醉據青梧枝
可以接覓夢猶然非別離茫茫太湖水無復西流時

酬徐姊見寄三首

竹窻風雨未曾闌溪水新添一尺寒艇子空思蕩秋
月寄聲蘆雁訊平安

其二

吳江還棹十日餘已覺前庭楫杙疎夜闌小婦然燭

起倩讀大姑相寄書

其三

西湖柳枝黛少減靈隱桂花香正稠銷人愁病只山
水問姊憶否越中遊

秋日林公見訪作

寒聲通遠林高林一蟬吟幽築亦幻住輕刀方見尋
酒無小乘戒語了空王心還析青鳥理飲師甘露深
知希齋詩爲王德操作

青谿纔一轉於此且鉏茅羣鳥下窺食孤雲來共巢

古苔依土壁積雨汎堂坳枕借書爲侶燈懸影作交
白華開補逸束帛動觀爻夜諷絕常語春遊辭近郊
時時挾風雅往往黜淫咬枯衲許相問襍賓誰見嘲
步庭携短竹酌醴命長匏澆蕙莎泉汲燔松石火敲
菜殘徽尚玉劒鈍室猶鮫曲柳因成兒寒葵每代存
坐看山不起眠得句忘鈔跼步駒千里栖靈鳳九苞
息機聊學圃進技乃同庖幻質傷朝槿浮榮賤斗筭
靜中虛似谷門外險如嶠我自足知我了無塵夢消

寄楊若水

簾冷霜華就夢遲
離離衰草砌蟲悲
去年絕浦停舟
夜共話危橋並馬時
無故又成經歲隔
閒愁鬢結一
春期百年消息今何似
莫使風烟負所知

秋日書懷呈司成朱先生二首

蕭條急雨薄秋林
隔岸聲聲亂暮砧
野竹經寒猶抱
節枯桐半死也成音
陰霾敢謂無晴日
湖海偏傷未
老心獨有過從賢太傅
東山拾取菊花簪

其二

空村徙倚竟何依
閒盡芙蓉柳漸稀
愁劇人人看欲

滯閑中事事覺來非從他忤俗還長佩未必酬恩不
布衣極目遙天無羽翼江鴻似向石城飛

問華工部孺抑病

蒼鷺來自遠颯然秋氣多荒村白日閑未有一人過
雄影翻遙壠蛩聲入逝波無時廢高枕同病却如何
送鍾先生廣文之洛中

握手古亭邊離心託暮烟雖然遊宦地猶是著書年
俸儉家難給門清晝足眠因爲洛生詠他日倘能傳
過子上

高齋曠何有盡日名香燼小逕閉蘭氣曲房橫石根
無爲問岩隱只此清人覓縹帙况如許遐哉千古言
村居讀王亦房詩

小築偶依渚微心何所要有時倚杖立閑見溪雲生
十日一家信經秋無市行忽焉諷高詠瑟瑟孤松聲
秋日村居十首

溪上立鷗鳥野人相對閑徐行深竹下孤詠落英間
昨夜適微雨開門無遠山乍驚舟近岸買藥一童還
其二

索居還自憐，獨影向秋蓮。
偶出尋溪月，聞聲得樹蟬。
船分遠近火，林曳有無烟。
不淺蒹葭意，佳人若箇邊。

王亦房期
數不至

其三

倏爾平野變空田，日氣黃獨愁誰與。
醉航臥亦云荒樹色不我待，秋風方未央。
試邀田父語語語，只農桑。

其四

兀坐竟何事，此心翻有營。
操觚殊媿姊，對酒乃懷兄。
未信蘭無氣，還愁雁不鳴。
躊躇蘋岸側，復已暮霞生。

其五

予有遠公約雲嵐剋日登夜中忽然起擁被如懷冰
妙義了無別衆生誰不能寧知村舍裏隱隱一慈燈
雲棲大師有
秋社之期

其六

涼雲覆短籬微月逗清漪任境非求寂叅微轉人疑
徒然文字習未謝一生知欲逆西江浪因風報我師
適泮梁陳師
以書寄余

其七

青林先生集卷之五
夜遙耿難寐出戶待晨星借鉢新盛露開函續寫經
溪容當檻碧鑪氣出樓青說偈林間鳥無僧遣共聽

其八

選石坐當水終朝誰勸酬迎神村姬鼓載婦苦師舟
童子指之笑吾心相與幽黃沙淹白首悔殺五陵遊

其九

荷篠有林叟去余三四家炊香菱角米絮熟葦條花
偶自唱樵逕不然乘釣查乃知耕鑿者帝力浩無涯

其十

當午衣初薄，盈旬髮未梳。松深投倦鵲，荷悴露遊魚。
川柰促秋釀，隣鷄醒夜書。去家還幾許，何夢不吾廬。
讀亦房天目遊草

携來山中語，青濛映寒樾。一酌還一吟，何必尋溪雪。
有所思

朝亦有所思，暮亦有所思。朝暮亦不常，我思無轉移。
解
豎却百尺篙，楚水深復深。我非赤鯉魚，那得見君心。

解二

芳樹不可噉置之大道側春風不如人憐汝好顏色

解三

孃來問我疾擁被鰥紅爪阿爺不解事孃前復羞道

解四

桃葉在其東杏葉在其西會合有後期天地無還年

解五

買得畫西施便欲逐其婦木桃持報君但恐不甘口

解六

靜嘯空存艸卷之四終

靜嘯齋存草

卷之五

留篋稿之二

送溫長卿北上至絕命詞計九十一首

蕭蕭存艸卷之五

西吳

董斯張遐周甫著
韓曾駒人穀甫訂

長卿北上四首

秋色政無邪况其離思重清笳浮隔澗征帆

去聲

入選

不及明朝月同聞楚寺鐘願爲西北雁烟路邈相
從

其二

相望

平聲

徒鬱陶徙倚江之臯亭午就官道長歌辭我

曹風林遙觸夢霜氣漸侵袍若渡寒江夜應知舟楫
勞

其三

勿復驚遠涉層霄且獨審歲華真浪影道業乃興璠
壽智莫如酒數窮恒在言自謀良已拙持以奉征轅

其四

又見深谿柳孤懸落照明於茲餞君處乃憶送予程
草草一時別依依當日情魂銷無可道入夜白波聲

同長文偶然作四首

野情多所愜恍爾就巉巖村僻人皆古林幽鳥不忙
憐花凭畫檻候霽曝秋衫此境復誰會悠悠天際帆

其二

昔人何必遠兀坐卽無懷有菊日當戶非醫誰到齋
烟雲真獨往山澤得吾儕縱未辭家去毋令茲意乖

其三

所居方近市去矣復何云夏未隨僧結秋還共客聞
床留一窻月茗煮半溪雲是夕不求寐空坐余與君

其四

風色暮逾勁，開庭吹葉枯。
據梧聽蟋蟀，帶雨刈雕胡。
道拙非求隱，才卑未棄儒。
勿爲賤無用，猶可置江湖。

訓亦房寄懷

廬居一，携手鷄骨黯相迎。
不忍見君色，因之傷我情。
惟餘多病母，稍遺小人羹。
掩淚未能語，中宵聞雁更。

其一

層樓面秋水，目與素心期。
始悔童子作，獨尋千古。
性靈能不掩，大雅豈難窺。
盡得如君者，誰嫌近世。

其三

濁膠沽未至村墅夜將分燈影照寒壁草蟲獨聞
起來忽攬月轉使驚離羣天目微可辯此中應有君

其四

出林未踰咫尺見漁師還試使停舟問前溪猶幾灣
驚禽迹方遠不露心彌關采采露下菊君來殊不閒

自浮梁歸寄亦房

新安始登岸轉憶苕谿濱石灘復問津數見支硎雲
入山憎馬疾孤吟來鳥聞小舟觸魚背亂岫生波紋
此樂豈恒有所傷無與羣往還變春候故國烟氛氤

不喜早來歸剋期方對君焚香古檜間持燭窮清
震澤塔院憶沈千秋

浮圖立斜日遠林盡成草昔者同懷人送我長安道
送沈正旃

歸來亦幾日征路又秋風孤棹信所往江潮無復東
知君前泊處不過遠雲中新秣空成釀妻其誰與同
與慶寺訪楊若木

快談兩無礙精義紛相溢坐使冷剝中雲烟五脊吸
巖息一水鳴眺深羣嶂立歸棹乘三更孤月正堪拾

長洪村店有懷

石路馬旣疲空村暝方歇誰言行役苦還次生離別
殘燭亂晨星寒衾抱春雪山月宛可憐髣髴鄉眉

旅宿

臨山行求盡落照一溪斜畏客前峰虎投人暝樹鴉
已知魚罷市數問酒無家計日新安路應餐白岳霞
渡震澤

野人偶憶東山期携客共棹湖之湄七十二峰入船
檻布帆不掛船行遲中流忽爾北風作遙樹盡沒雲

離離白波如山來打柁或下或高驚櫂師有客對此
失人色首搔齒戰誰可持嗟哉此客亦復癡余也談
笑爲道之人間何處不如此翻天沃日君未知文夫
有命自天地畏死徒令達者嗤與其僵臥兒女手豈
若飽飼魚龍爲

下第述懷

繁霜樹樹向人凋裘敝還憐去國遙誰肯低頭問安
子只應掉臂入漁樵家從貧去心難死酒到愁來氣
轉驕不見庭前新墜葉曾將顏色闢花朝

下第後華孺抑工部以詩見慰賦答

澤之車羸馬鳴仍向江南路上行十年失意那能
九千里別親何所營未見救饑有長策自知譚笑非
人情歸來一事差不惡隔水訪君問磬聲

効古塞上曲

八子雖知臣未若單于甚聞聲不敢南馬斷黃河飲
臨將罷獵至驛弓背雕錦沙磧爭醉眠是誰令安枕

贈譚夢者

客不惟說夢說罷轉堪疑寂寂孤鐘下誰人是寤時

觀釣

一夜墜楓葉隨風俄滿溪獨看釣魚艇閑繫垂楊隄
得失似相半浮沉多不齊深潛猶未免况乃學高栖

金山寺

江上立晴峰春烟古殿封萍間千尺塔浪裏一聲鐘
赴食有寒鷺聽經來毒龍登艫數回首隱隱暮城春

茅止生至自燕賦贈

火雲爍中野大澤沸不流鯨人喪所居持淚方見投
旣攬九州烟徘徊憇故丘斗酒急相勞清辯多獻酬

有事于刪詩大雅紛可求清角奮孤響皇芻靡襍收
沿瀾獲其原陽靈燭深幽誰能掩真性俯與季葉謀
悲咤子繼之風林鳴颼颼古人富奇略逝者不可留
豈無青霞意鬱爾沉千秋康娛畢一生無乃志士羞
天豈遺我哉歷予以百憂鍊神在藥石君子多窮愁
鳳兮音若簫將爲玄扈遊玄扈樂帝心高謝羅者儔

金閨舟中聽周四彈三弦歌

蛻膏然丹螺盞熱江南女兒倚蘭楫鈿蟬拂翠驕鶯
鴛輕裾乍迴洛川雪鮮脣試歌子夜闌周郎闔伎絃

新憂蜀國初彈第一絲山青雲碧空江咽雁峰寒瀑
真珠濺設設松濤轉孤絕繁音襍遯山鬼語鮫人淚
作長空雨宛轉移商還入羽西風驥子章臺去桃汗
縱橫六轡舞紫鞭微敲嘶更怒下蹄蹋碎芙蓉嬌
妃墮鬟眉角聚須臾停柱出緩聲冷烟無情逗秋浦
幾鴻單鳴天黯黯下啄黃蘆索其母本名馬上雁兒
冬感感傍人盡蕭索船尾撥刺驚夜魚瓠巴之瑟當
丘古人妄語徒爲爾竹耶肉耶誰可如太原擊節
西跳奴子請歸頭屢掉乃知聲伎真有神天遣奇

入補歌笑

送駱象先侍御

就君青松下爲君命離尊不折九秋垂柳枝
斫取百尺寒松根以此贈君誠有意霜中屹然出孤翠
只今萬里空塵沙跳丸日月皆無氣野人對之驚絕魂
雪溪向人誰敢言看君此行聳天下靈鳳嗷嗷蒼龍門

漂母祠

千秋有婦人英靈可不死我行古祠下鬚眉徒爾爾

寄內二首

故山空入夢憶汝遠相憐日暮傳家信還當七夕前

其二

昨日澹無色寥寥石間照忽想寄衣人久罷粧前笑
再酬亦房見訪不遇舟行寄懷之作四首

未來書已到俟爾試新醕小出意旋返經旬言始廻
棹乘寒月轉門帶晨星開坐使故人去日歸胡遽哉

其二

適予北返日值子東還晨彼此笑無旣輕舟何所因
擁雲臥空簟抱病辭隣人驟得寄來語支願讀數巡

其三

託契果何在深心看佩刀七年呼爾汝千載得吾曹
此外竟誰問相思能不勞娟娟秋月滿小逕閉蘭皋

其四

燕市憶君苦歸心日夜參及歸祇如此離恨亦誰甘
無復蒲萄錦云酬疇昔簪驚魂望天末搖落正江南

戲成四絕句

舊日雄心未肯摧寶刀夜夜吼成雷紅塵那得填雙
眼只許空山入夢來

其二

走馬長堤柳色新
錦裘當酒對嬌春
無端忽有楊朱哭
哭盡千年意氣人

其三

東隣昨日到吳姬
一曲涼州蕩客思
不是婦人偏可近
從來世上少男兒

其四

垂釣清溪溪水深
依依殘照遠山沉
王孫不受尋常飯
誰有淮南老母心

寄遠二首

贈取同心五色綾
柔情密向九光燈
桃花奪盡千花
詎一夜寒波失武陵

其二

宋玉含愁向隔牆
春風空送翠鈿香
多情一片巫山
雨化作紅衫淚萬行

九日無菊有懷却寄

雨歇空樓夜色分
一杯獨酌晚江雲
從來別債償難
盡今日黃花又共君

其二

短牆深樹有啼鴉一片離魂接暮霞十日歸期應不
誤簾邊與汝帶秋花

龍涇夜

啼鴉夜半啼樹頭有客不眠高館秋桐花壓露未乾
子北斗斜插西南樓

孤山訪范長倩遇趙文度沈無回作

小艇方夾猶微茫遠鐘續中流返照沉橋轉羣峰束
夾岸何蕭蕭新楓碎湖綠眇焉蔥青際數椽立山曲

知有靜者栖扣之諧所欲携家二十日探幽無不足
空樓攬秋靄閑雲澹相觸水木神自驕烟林嗜彌酷
邂逅皆素心高言振寒玉始了獨寐非玄芝結遐躅
極目長天蒼予情在黃鵠

湖上呈徐姊范夫人

憑虛宿湖影水氣寒青楓何處亂雲合一時千嶂空
遙心邈孤往秋色來無窮卽此足終歲蘭舟寧遽東
壽朱君永侍御六袞

憶君少年冠豸冠有威者鳳青雲翰上殿豈顧丞相

瑄露章却使將軍寒使車東下吳人歡萬樹不畏春
闌珊一朝誤有長沙謫浪跡烟霞殊所安舌如懸河
眼如電垂老意氣誰能殫吾能倒駟西日迴北斗伸
肩語天爲君壽願得峴首以爲齒碧湖之濤以爲酒
逸老堂下春風新馬蹄歲歲穿楊柳下馬垂竿向湖
口但恐明王念耆舊湖山未果君家有

逢冷公

一片明月水泠然似爾容眠應隨碧月嘯或激青松
振錫來何日聞猿第幾峰無生非獨悟未敢定浮蹤

金仲栗訪予竹溪賦贈

放棹竟何在徘徊南渚陰避喧成我癖命酒得君深
芳草幾人惜閑雲能獨尋秋花黃漸老未別若爲

送內兄伯隣沈比部北上

凍樹郊全晦征輶不可停宦游裝太薄離席酒難醒
署冷閑烹雪朝嚴曉候星青天如憶遠鴻雁有霜翎

送韓延年

斗溪寒色滿空樓濁酒胡床擁敝裘盡取愁心當歲
暮今朝又上送君舟

雪中訪陳眉公不遇

亦就城中廬不宿城中烟雙扉關暝色與雪俱蕭然
相尋迫殘歲相期討幽事所見豈徒云了了幽人意
雪花已滿裾去矣方躊躇預思對君日視此還何如
韓延年仲弓昆季招集峴首作

寫憂此巖際自晉當日曛迅颺清人脾遙樹爲玄雲
墜葉密蟲篆崇石荒苔文臨渚暢魚樂陟林兮鳥羣
玉樽在危榭碧月來窺君蕙銷有餘悵栢悅方共欣
近情自盈感停虛亮無分携醉下山夜澄波蕩秋氛

馳年莫予駐靈阜恒氤氲勝事苟不閒逝者何足云
重送溫長卿中允入都

待此花事盡曠然辭故山始知滄洲趣不遠華纓間
君去復誰語予情方未閒及時雨天下草野開離顏
送王五亦房之黎陽謁周明府

有書不讀今人言有裾不曳通人門兀兀小齋坐清
晝春鳩喚雨庭花翻忽爾出門二千里觸熱烟沙訪
知己賣得山田供客糧少婦啼饑笑相視周侯重爾
如相如茲行豈復歌無魚魏中奇上不殊古倘得其

人當報予

題閔康侯草堂用社韻

清溪悠然立草堂白石不用歌康浪輕陰欲散圍鳥
寂積雨偶晴池荷香但容我到日成醉未及子言心
已涼丈夫幽寄有如此高枕肆志非今狂

項羽吟

天乎天乎楚社夷謂戰之罪而更非諸侯蒲服如嬰
兒叱咤千人廢不持夜中濺血傷我妃昔者何健今
何疲江東父老欲王之籍雖不言無媿哉白日欲冥

羣鳥悲江水湯湯離北來提劍自裁淚不滋漢以千金購我屍亭長獻之往勿疑幸謝季也母我蚩鬼神不右非女爲

補昭人歌

人而無禮兮良足歎不見山中之狺狺口可以食亦可以言

補江上歌

蘆中唱已意胥定有酬爲補歌

江上丈人心何長持檝亂我江之陽白日暉暉涕縱

橫迅風四來增慨慷生我者子父母雙含情飲德浩
無疆千金一劍子可藏追者且至無相忘

藻廉歌

阿母七日來帝居賚以上清十二書靈人蚤誠胡忽
諸緹士錦樹張黃圖使人使鬼無復蘇嗟哉神人道
不殊水木之精臣自呼帝幸念之遷厥初河水決滸
臣所都弦歌一曲聲何遐貝宮徑寸光明珠獻帝萬
壽樂無渝

讀曲歌 二首

三更起擊枕雙臂酸不支自儂枕汝來教儂伴阿誰

其二

臨風忽成噫知歡寄儂意轉恨無心郎相思未曾三

其三

郎騎白馬來看殺樓中我忍笑待郎嬉含驚怕郎墮

其四

日見日未足滅燭孃徒爾亮月來綺窻帷中再凝視

其五

小姑夜鳴機非儂不汝憐爛草持作鞋渠可便值錢

其六

簪髻不用花照承不用鏡照鏡諱鸞抵簪花厭蜂競

其七

擁衾坐許久蘭釭添復數正爾秋夜長何不移置昨

其八

儂如一弦琴獨絲纏相交歡如雙耳鼓慮爲他人搖

其九

別歡非一日有淚腹中注恨激爾許肥持底自相誤

其十

儂性不耐閑獨眠何用生合却瑤璃盞滋味無由盛
其十一

輕黃持點額罷粧還自喜百果置雕盤儂情欲榴子
其十二

十日不窺牖後園花放齊薔薇刺儂衣蛺蝶投儂懷
演禽言二章

廣記云顧渚有鳥作春去來之響恨曹詠獨
所未逮遂演之

春來也奈汝何薄雪初霽溪烟餘微風吹我天桃華

青明
卷之三
紫華齊葉漾晴波杏黃衫子騎白駒美人不來公子
嗟弦嘈嘈日欲斜懷我同心焉知其他嗟嗟春來也
奈汝何

其二

春去也奈汝何蝴蝶不肯采落花小梅可噉酸齒牙
種蚕孃子攀桑柯遠望之其貌勝朝霞使君道旁空
婆娑驅馬獨自還低頭無精華嗟嗟春去也奈汝何

浩歌二章

積錢不肯施將以貽後人飛閣入曾霄斧柱而爲薪

乾維際續日况我七尺身鶴上弄紫烟晞髮於西崕
咄嗟復咄嗟浮華多苦辛

其二

繪楫松爲舟其名曰赤馬周鄭無異聲鼠玉未相假
飛塵聚沫中是非誰定者俗士守蓬心以我喪其我
身爲意樹驅眼爲空花惹所謀祇鉉槩所漁則妖冶
生無一日歡景逼悲泉下澄江浩以逝欲西終不可
王疏竟何許鮑亂沙丘野一爲狐兔隣萬事解如瓦
哀情逐雲注繁弦詎能寫市鐘非無情令我蹶然坐

有酒方攢眉菟裘在蘭若

絕命詞十五首

梨花論在復如何三十春秋歎逝波下里新聲埋白
雪高堂明鏡泣黃河雁行乍失雲中字駒影誰揮日
暮戈生死因緣無所礙幽魂不肯寄蜂窠

蜂窠逝死見坡集

其二

雄心蕭瑟對玄雲振羽青丘有鶴羣狂象祗應調半
偈蠹魚空復辯三墳彈琴何似蘇門嘯投閣猶傳蜀
郡文總是人生一朝槿彭殤夭壽竟誰云

其三

亦儒亦道亦枯禪
千古奇情手一編
蟲臂鼠肝園吏
夢心燈意盡
堯王天本來去住俱空相
前識浮游總
幻緣何處溪聲通客枕
樓頭夜夜月長圓

其四

十年浪跡五湖涯
歷落蓬門白蛤斜
巴蜀杜鵑新帝
鳥洛陽魏紫舊妃花
無情出岫雲成我
到處飄萍雪
是家客夢蕭然關塞遠
西園擲否綠沉瓜

武帝在西園中聞作

彥升詩擲瓜
悲不自勝

其五

雕虎空山嘯北風芙蓉劍氣宛成虹
軍中盡化猿君子海上還逢鼉相公
西姥帝方邀獻酒東皇日欲借爲弓
鏡湖鐵笛愁無那搔首青冥數去鴻
穆王時君鶴蘇長公云某到處被鼉相公斷壞一言變化不恒一言升沉有定也日爲矢兮天爲弓古墓中語西姥生之嗟二句有憂

其六

寒風感栗怒天吳俠客精魂未便枯
旱母也知東海孝鉅靈翻惜北山愚
錢唐石上三生句仙掌臺中六

甲符前度劉郎貧似我無勞野鬼共挪揄

其七

人間偶謫幾經春竹裏餐霞性未馴曾見白龍殘孔
甲何須黃雀歎莊辛菩提樹古知非樹空谷人寒喜
似人石冷雲枯千里色楚江一夜掃清蘋

其八

風雨龍門一敞廬山心寂寂草玄餘誰人狐假連山
易有客螢爭汲冢書結夏僧招俱惠遠悲秋賦早似
相如鴛鴦瓦上霜侵骨獨夜空樓氣不除

其九

世綸淮水舊王孫雪涕難酬國士恩潦倒不辭頭見
青飛揚自許舌猶存漢濱遊女看珠採南國高人想
王溫竹死鸞空亦何恨神樓十二在崑崙

王溫用徐孺故實溫

其如玉屬旁
借意指亦房

其十

本是長沙賦鵬才振衣千仞意悠哉誰分不死仙洲
草浪說同心漢苑梅有斗有箕天上列非雲非雨夢
中來生平傲似虞翻骨但遺青蠅到夜臺

箕斗二詩
喻浮名俱

其十一

楚客高冠佩陸離青琴鼓瑟舞馮夷三蕉軟飽時中
聖一刺通魂只大兒君輩且尋名教樂我曹強半有
情凝碧天似化萇弘血噓倚孤松弔月眉
六朝詩云
危噓才寸
陰

其十二

記得宵書眼盡經青燈然雨醉空亭瓊池蟾去入山
月玄海鯨消怪辨星竈下中郎紛鷁咽山間宰相但

青瑣三石州 卷之三
鴻冥幾回欲向高天問苦霧晨蕤帝未醒

其十三

汝曹無笑次公狂大塊分明傀儡場入手靈又常品
屈到頭奇骨也郎當洛中驚蝶從人妬稷下雕龍轉
我長底事迷津都不識還持瓶鉢懺醫王

其十四

爲君一唱苦寒行霜滑松枝鳥亦驚五字才名成燕
麥三更歸夢斷鱸羹林間露下還如泣江上潮來儘
不平未向曆官通姓字東方誰識是星精

其十五

紙上曇花偶自拈
烟青石葉夜鑪添
谷神語合猶成綺
谿刻名留未是廉
好客從來龍作畫
獻功何意虎爲鹽
可憐眉目皆齊楚
徙倚風前想蜀嚴

好客二語亦如夢意

靜嘯空存艸卷之五

終

靜嘯空存艸卷之五

宋之玉

三